

DOMENIE XXXI «VIE PAL AN»

Jutoris pe Liturgjie

Domenie, ai 3 di Novembar dal 2019

Tal vanzeli di vuê Zacheo, piçul di stature, si rimpine suntun sicomôr par podê viodi Gjesù. Al è un episodi tant originâl, simpatic, che nus mene, fra l'altri, in cjase di un pecjadôr.

Al è biel viodi in chest fat prime di dut la libertât interiôr: libertât di Zacheo fûr de logjiche dai siôrs di ogni timp; al sarà dificil viodi un om de alte societât borghêse a stafarâsi fra i ramaçs di un arbul; libertât di Gjesù che al jentre in cjase di Zacheo intant che ducj a bruntulavin; e libertât dal Spirtu Sant che al rive cu la sô gracie li che noaltris no imagjinìn.

Chest episodi al aparten a chei tancj moments li che Gjesù nus incjantone e nus domande di fâ i conts cu la nestre vite, bieles o brute, sante o di pecjât.

O vin tante dibisugne di fats come chest par dispeâsi di chê sacralitât clericâl che e confont il vanzeli cun regulis glesiastichis lontanis de vite concrete che o sin segnâts.

Sburtât de sô situazion personâl, Zacheo al sta cirint une peraule, un consei, une pâs interiôr che fra i tancj amîs vêrs e fals nol cjate.

E lui e Gjesù si incuintrin: un sul sicomôr e chel altri che i dîs: Zacheo, dismonte svelt...

Dut si concludarà cuntun grant gustâ li che Zacheo, jevant in pîts, i disè al Signôr: Signôr, jo ur doi ai puars mieze de mê robe e, s'ò ai robât, o torni cuatri voltis tant.

Gjesù i rispuindè: Vuê la salvece e je jentrade in cheste cjase.

E cu la salvece: altre vite, gnovis relations bielîs, veris, sinceris e umanis, gjonde e pâs.

Antifone di jentrade

Sal 37,22-23

Signôr, no sta bandonâmi;
Diu gno, lontan no sta restâmi.
Spessee a judâmi, Signôr, mê salvece.

Colete

Diu onipotent e bon di cûr,
che tu ur fasis ai tiei fedêi il regâl di servîti in maniere degne e sante,
danus la gracie di cori cence nissun impediment
viers di ce che tu nus imprometis.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Sap 11,22-12,2

Tu tu âs dûl di ducj. Tu tu ur vuelis ben a dutis lis robis ch'a so

L'autôr, di Alessandrie di Egjit, - o sin cualchi an prime dai tîmps di Gjesù - nus lasse chest cjantonut mistic li che la bielege dal cîl e de tiere si confondin cul amôr di Diu viers di ogni creature.

Chest fedêl ebreu al è cussì cjapât des maraveis de creazion e de bontât dal Creadôr che dut par lui al devente semplice intimitât, dolce poesie. E il Signôr al è culî tant che un di famee, in plene confidence, par vie che tu sintis che ti vûl ben.

Podèssino ancje noaltris viodi la creazion e lis personis cul vòli e cûr dal compositôr de Sapience... Imprese tant dificile fra asfalts, machinis che a corin, telefonins, internet, informazions, mont artificiâl e il timp che nol è plui. Però, nus fasarès dome ben lassâsi cjapâ l'anime di emozions e tenarece.

Dal libri de Sapience

Signôr, il mont intîr al è denant di te
tant che pulvin su la staderie,
e tant che une gote di rosade ch'e cole su la tiere denant di.
Tu tu âs dûl di ducj, parcè che tu puedis dut,
e tu dismenteis i pecjâts dai oms par che si mendin.
Tu tu ur vuelis ben a dutis lis robis ch'a son
e no tu âs in asse nuie di ce che tu âs fat,
parcè che se tu odeassis alc,
no tu lu varessis nancje dât dongje.
E cemût podaressie jessi une robe, se tu no tu vuelis,
o durâ ce che nol è stât clamât di te?
Ma tu tu âs dûl di dutis lis robis, parcè che a son tôs,
Signôr, che tu i tegnis a la vite.
Il to spirt incorutibil al è in dutis lis robis.
Par chest tu cjastiis a planc a planc chei ch'a colin
e tu ju corezis, ricuardantjur lis robis là ch'a pecjin,
par che, liberâts de tristerie, a crodin in te Signôr.
Peraule di Diu.

SALM RESPONSORIÂL

dal Salm 144

Ce che un moment indaûr o vin cjatât a nivel di riflessione e di poesie, culi al ven palesât tune esperience personâl: O vuei laudâti, gno re e gno Diu.

E il motîf al è profont, grandonon: il Signôr al è stât e al reste pazient e di boncûr cun te, cun me, cun ducj; lui al è vignût a cirî e a salvâ ce ch'al jere pierdût. E duncje:

R. La glorie di Diu al è l'om ch'al vîf.

Se cjanât: Il cjant dai salms responsoriâi, p. 257.

O vuei laudâti, gno re e gno Diu,
o vuei benedî il to non in eterno e par simpri.
O vuei benedîti une di daûr chê altre
e laudâ il to non. **R.**

Il Signôr al è pazient e di boncûr,
pegri tal inrabiâsi e splendit te misericordie.
Al è bon cun ducj il Signôr,
il so afiet al rive sun dutis lis sôs voris. **R.**

Che ti laudin, Signôr, dutis lis tôs creaturis,
che ti benedissin ducj i tiei fedêi.
La glorie dal to ream ch'a contin,
dal to sflandôr ch'a fevelin. **R.**

Che ur fasin cognossi ai fîs dai umign la sô potence,
il sflandôr dal so ream e la glorie.
Lui al ten sù chei ch'a clopin,
al torne a jevâ sù chei ch'a son colâts. **R.**

SECONDE LETURE

2 Ts 1,11-2,2

Ch'al sedi glorificât il non dal Signôr nestri Gjesù in vualtris, e vualtris in lui.

A disin che il timp e la storie a insegnin pôc o nuie. Di fat, come in zornade di vuê, ancje ai tims di S. Pauli e jere facile propagande sul cont de vignude dal Signôr e de fin dal mont: rivelazions profetichis, discors, o adiriture une letare...

Ma S. Pauli al tae curt: no stait a lassâsi impressionâ cussi a la svelte, no stait a pierdisi in chês fufignis e peteçs.

Invezit, il Signôr al colmi dute la vuestre volontât di ben e dute la vore de vuestre fede... in oparis simplicis, umilis, te disponibilitât e bontât viers dal prossim di ogni dì.

De seconde letare di san Pauli apuestul ai Tessalonicês

Fradis, nô o prein simpri par vualtris, par che il nestri Diu us fasi degns de sô clamade e cu la sô potence al colmi dute la vuestre volontât di ben e dute la vore de vuestre fede, par che in vualtris al sedi glorificât il non dal Signôr nestri Gjesù e vualtris in lui, par glorie dal nestri Diu e Signôr Gjesù Crist.

Cumò us prein, fradis, sul cont de vignude dal Signôr nestri Gjesù Crist e de nestre riunion cun lui, di no lassâsi impressionâ cussi a la svelte tal vuestri spirt e nancje spaventâ parvie di rivelazions profetichis, di discors o di une letare che us varessin mandade nô, come se la zornade dal Signôr e fos propit par rivâ.

Peraule di Diu.

CJANT AL VANZELI

Is 61,1

R. Aleluia, aleluia.

Il spirt dal Signôr Diu al è parsore di me,
mi à mandât a puartâur la buine gnove ai puars.

R. Aleluia.

VANZELI

Lc 19,1-10

Il Fi dal om al è vignût a cirî e a salvâ ce ch'al jere pierdût.

A Rome si è a pene concludût il sinodi su la Amazonie. In chê foreste a son tribùs che a fasin la lôr bieles cjase di len parsore dai arbui e a vivin cu la famee lenti sù. Tal mont di vuê, a son come Zacheo sul sicomôr - Zacheo al vul dî "net, limpit" - e a spietin che al finissi il disordin dai filibustîrs des multinazionâls. A stan cialant se finalmentri come te citât di Gjerico al rive nestri Signôr, une imprese oneste, une persone umane, disint: vuê o ai di fermâmi in cjase tô.

Ma ancje culî in Friûl, daûr dai vecjos balconis di un condomini o te cjase dongje de strade cence fruts a vivin tribulâts; a stan scrutant se, fra chei che a corin come sfulmenâts, cualchidun al cjamine, vistît di umanitât: chel al è il lôr Gjesù, vignût a cirî e a salvâ ce ch'al jere pierdût.

Dal vanzeli seont Luche

In chê volte, Gjesù, jentrât te citât di Gjerico, le passave fûr par fûr. E ve che un om di non Zacheo, ch'al jere soestant dai publicans e siôr, al cirive di viodi cui ch'al jere Gjesù, ma nol rivave; di fat e jere un disordin di int e lui al jere masse piçul. Alore al corè indenant e, par rivâ a viodilu, si rimpinà su par un sicomôr, parcè che Gjesù al scugnive passâ par li. Gjesù, cuant che al rivà sul puest, al alçà i vôi e i disè: «Zacheo, dismonte svelte, che vuê o ai di fermâmi in cjase tô». Al spessea a dismontâ e lu acetà dut content. Viodint une tâl, ducj a bruntulavin: «Al è lât a lozâsi in cjase di un peçjadôr!».

Ma Zacheo, jevant in pîts, i disè al Signôr: «Signôr, jo ur doi ai puars mieze de mê robe e, s'ò ai robât, o torni cuatri voltis tant». Gjesù i rispuindè: «Vuê la salvece e je jentrade in cheste cjase, parcè che ancje lui al è fi di Abram. Che di fat il Fi dal om al è vignût a cirî e a salvâ ce ch'al jere pierdût».

Peraule dal Signôr.

Su lis ufiertis

Chest sacrifici, Signôr, ch'al sedi par te une ufierte monde
e par nô la sante liberalitât de tô misericordie.
Par Crist nestri Signôr.

Antifone a la comunion cf.

Sal 15,11

Tu mi âs fat cognossi il troi de vite,
denant di te gjonde fin parsore il cjâf, Signôr.

Daspò de comunion

Che si fasi sintî simpri plui in nô, Signôr, la vore de tô fuarce,
par che, sostentâts cui sacraments dal cîl,
si preparin a ricevi ce ch'a àn imprometût.
Par Crist nestri Signôr.

* * *

Cjants

Libri *Hosanna*, sot il titul *Eucaristie*: messe, benedizion eucaristiche, rîts e cjants; dal n.7 al n.62
comprendût.

* * *

Per mantenere l'onorabilità uno decide di separarsi dagli altri; la carriera non sopporta un'ombra sul proprio curriculum. Passate pure vi cediamo il mezzo della strada; noi camminiamo sui cigli e verremo avanti quando e come potremo. Vi domandiamo una sola carità: benchè non abbiate dubbi sulla nostra colpevolezza, non sgridateci troppo forte come siete soliti. Ci impedireste di ascoltare l'unica parola fatta per noi e che nessuno ci rivolge all'infuori del Signore: "Va in pace; non peccare più" poiché il Figlio dell'Uomo è venuto per cercare e salvare ciò che era perduto.

Io sono il "perduto" e per farmi ritrovare mi metto sulla strada di Gerico, la città del mio perdimento e della mia salvezza.

Zaccheo, di don Primo Mazzolari

* * *

Ai 5 di Novembar

Ss. Martars Aquileiês

Intune sole zornade e cuntune sole laude o cjapìn dentri ducj i martars di Aquilee, comprendûts
chei ch'o sin sigûrs dal lôr martueri, come Anastasie, Largji, Anastâs, Clement, Ciriache, Muscje,
Tecele, Eufemie e Dorotee, ma che lis sengulis notiziis no son siguris o claris o ben lis rigjavìn di
contis une vore plui in ca. Inte stesse fieste o venerìn ancje i testimonis pe fede che no cognossìn i
lôr nons ma ch'a àn rinfuartide la Glesie aquileiese cu la lôr confession e cul lôr sanc.

* * *

* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal
popul furlan, Ed. Glesie lis mans par serviti Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Par domandâ chescj libris scrivêt a info@glesiefurlane.org*